

水經注匯校

地710.1
886



水經注匯校卷二十九

江西新城楊希閔臥

後魏 鄺道元



沔水 潛水 湍水 均水

粉水 白水 比水

沔水與江合流又東過彭蠡澤

尚書禹貢匯澤也鄭玄曰匯回也漢與江鬪轉東成其澤矣。

又東北出居巢縣南案此經及下又東過牛渚當在其一東北流之下又過毗陵縣北為北江之上

古巢國也湯伐桀桀奔南巢即巢澤也尚書周有巢伯來朝春秋文公十二年夏楚人圍巢巢羣舒國也舒叛故圍之永平元年漢明帝更封菑丘侯劉般為侯國也江水自

水經注匯校 卷二十九

濡須口又東左會柵口水導巢湖東逕烏上城北又東逕南譙僑郡城南又東絕塘逕附農山北又東左會清溪水水出東北馬子硯之清溪也東逕清溪城南屈而西南歷山西南流注柵水謂之清溪口柵水又東左會白石山水水發白石山西逕李鵲城南西南注柵水柵水又東南積而為竇湖中有洲湖東有韓綜山山上有城山北湖水東出為後塘北湖湖南即塘也塘上有潁川僑郡故城也竇湖水東出謂之竇湖口東逕刺史山北歷韓綜山南逕流二山之間出王武子城北城在刺史山上湖水又東逕右塘穴北為中塘塘在四水中水出格虎山北山上有虎山城有郭僧坎城城北有趙祖悅城並故東關城也昔諸葛

恪帥師作東興堤以遏巢湖傍山築城使將軍全端留略
等各以千人守之魏遣司馬昭督鎮東諸葛誕率眾攻東
關三城將毀堤遏諸軍作浮梁陳于堤上分兵攻城恪遣
冠軍丁奉等登塘鼓譟奮擊朱異等以水軍攻浮梁魏征
東胡遵軍士爭渡梁壞投水而死者數千塘即東興堤城
亦關城也柵水又東南逕高江產城南胡景略城北趙云
略事見南史韋叡傳然有奇疑者梁天監四年是魏孝昌
元年明年道元被害于陰槃其成書又不知在何時安得
遽取胡趙築城以相證而又云魏事已久難用又東南逕
取悉何耶此與襄陽水下引吳均詩同一異也
張祖禧城南東南流屈而北逕鄭衛尉城西魏事已久難
用取悉推舊訪新略究如此又北委折蒲浦出焉柵水又
東南流注于大江謂之柵口

水經注匯校

卷二十九

又東過牛渚縣南又東至石城縣案牛渚乃山名非縣名大

二字之上有脫文牛渚在今當塗縣西北二十里石城故城
在今貴池縣西七十里道元辯經之誤云不得逕牛渚而方
居石城也今考石城不特在牛渚西且在居巢西居巢故城
在今巢縣東北五里漢書地理志丹陽郡石城下云分江水
首受江東至餘姚入海餘姚當是餘杭之誤作水經者本之
曰至石城縣分爲二其一東北流其一又過毗陵縣北爲北
汜又東至會稽餘姚縣東入于海以地望推之訛舛不可通
汜水與江合流又東過彭蠡澤下當云又東過皖縣南又東
至石城縣分爲二其一東北流又東北出居巢縣南又東過
牛渚又過毗陵縣北爲北江其一東至會稽餘杭縣東入于
海則與漢志適協不言北江所終者水經之末記禹貢山水
澤地所在云北江在毗陵北界東入海大江源委固首尾完
備矣然汜水經文自彭蠡以下在道元時已亂道元雖正
其失而言之亦未能明析是以自言緝綜所躋未必一得其
也實

經所謂石城縣者即宣城郡之石城縣也何云此即漢志

也晉以後牛渚在姑熟烏江兩縣界中于石城東北減五
屬宣城

百許里安得逕牛渚而方屆石城也蓋經之謬誤也

分爲二其一東北流其一

案此二字當在東至會稽餘姚縣之上

又過毗陵縣

北爲北江

地理志毗陵縣會稽之屬縣也丹徒縣北二百步有故城

本毗陵郡治也舊去江三里岸稍毀遂至城下城北有揚

州刺史劉繇墓淪于江江卽北江也經書爲北江則可又

言東至餘姚則非攷其逕流知經之誤矣地理志曰江水

白石城東出逕吳國南爲南江

案地理志丹陽郡石城下云分江水首受江東至餘

姚入海于會稽郡吳下云南江在南東入海本屬二水各不相蒙道元合之爲一非也

趙云道元依經立注誤以震澤爲南江而又合分江水言之謂其水得至餘姚入海

遂改竄班志以就已說且班志云吳故國周太伯所居六

朝時曰吳國道元因改縣曰國也江水白石城東入爲貴口東逕石城縣

水經注匯校

卷二十九

三

北晉太康元年立隸宣城郡東合大溪溪水首受江北逕

其縣故城東又北入南江南江又東與貴長池水合水出

縣南郎山北流爲貴長池池水又北注于南江南江又東

逕宣城之臨城縣南又東合涇水南江又東與桐水合又

東逕安吳縣號曰安吳溪又東旋溪水注之水出陵陽山

下逕陵陽縣西爲旋溪水昔縣人陽子明釣得白龍處後

三年龍迎子明上陵陽山山去地千餘丈後百餘年呼山

下人合上山半與語溪中子安問子明釣車所在後二十

年子安死山下有黃鶴棲其冢樹鳴常呼子安故縣取名

焉晉咸康四年改曰廣陽縣溪水又北

趙云此溪水卽旋溪也

合東

溪水水出南里山北逕其縣東桑欽曰淮水出縣之東南

北入大江案此水今亦名小淮河其水又北歷蜀由山又北左合旋

溪北逕安吳縣東晉太康元年分宛陵立縣南有落星山
山有懸水五十餘丈下爲深潭潭水東北流左入旋溪而
同注南江南江之北卽宛陵縣界也南江又東逕甯國縣
南晉太康元年分宛陵置南江又東逕故鄣縣南安吉縣
北光和之末天下大亂此鄉保險守節漢朝嘉之中平二
年分故鄣之南鄉以爲安吉縣縣南有釣頭泉懸湧一仞
乃流于川川水下合南江南江又東北爲長瀆歷湖口南
江東注于具區謂之五湖口五湖謂長蕩湖太湖射湖貴
湖溇湖也郭景純江賦曰注五湖以漫漭蓋言江水經緯
五湖而苞注太湖也是以左丘明述國語曰越伐吳戰于

水經注匯校 卷二十九

四

五湖是也又云范蠡滅吳返至五湖而辭越斯乃太湖之
兼攝通稱也虞翻曰是湖有五道故曰五湖韋昭曰五湖
今太湖也尚書謂之震澤爾雅以爲具區方圓五百里湖
有苞山何云苞當作包春秋謂之夫椒山有洞室入地潛行北通
琅邪東武縣俗謂之洞庭旁有青山一名夏架山山有洞
穴潛通洞庭山上有石鼓長丈餘鳴則有兵故吳記曰太
湖有苞山在國西百餘里居者數百家出弓弩材旁有小
山山有石穴南通洞庭深遠莫知所極三苗之國左洞庭
右彭蠡今宮亭湖以太湖之洞庭對彭蠡則左右可知
也余按二湖俱以洞庭爲目者亦分爲左右也但以趣矚
爲方耳旣據三苗宜以湘江爲正是以郭景純之江賦云

爰有包山洞庭巴陵地道潛達旁通幽岫窈窕山海經曰
浮玉之山北望具區茗水出于其陰北流注于具區謝康
樂云山海經浮玉之山在句餘東五百里便是句餘縣之
東山乃應入海句餘今在餘姚鳥道山西北何由北望具
區也以爲郭于地理甚昧矣言洞庭南口有羅浮山高
三
千六百丈浮山東石樓下有兩石鼓叩之清越所謂神鉦
者也事備羅浮山記會稽山宜直湖南又有山陰溪水入
焉趙云山陰溪水即茗水具區山之陰所出之水也後人見有山陰二字下句即填入縣字而水道不可問矣
山陰西四十里案山陰下近刻衍縣字有二溪東溪廣一丈九尺冬
煖夏冷西溪廣三丈五尺冬冷夏煖二溪北出行三里至
徐村合成一溪廣五丈餘而溫涼又雜蓋山海經所謂茗

水經注匯校

卷二十九

五

水也北逕羅浮山而下注于太湖故言出其陰入于具區
也湖中有大雷小雷三山亦謂之三山湖又謂之洞庭湖
楊泉五湖賦曰頭首無錫足蹠松江負鳥程于背上懷太
吳以當胷岝嶺崔嵬穹隆紆曲大雷小雷湍波相逐用言
湖之苞極也太湖之東吳國西十八里有岝嶺山俗說此
山本在太湖中禹治水移進近吳又東及西南有兩小山
皆有石如卷竿俗云禹所用牽山也太湖中有淺地長老
云是竿嶺山躡自此以東差深言是牽山之溝此山去太
湖三十餘里全云自潛通瑯琊以下皆襲山海經無稽之言而更廣爲附會東則松江出
焉案此六字原本及近刻並訛作經攷以下皆係注內敘太湖之水下流注海爲三江者今改正上承太
湖更逕笠澤在吳南松江左右也國語曰越伐吳吳禦之

笠澤越軍江南吳軍江北者也虞氏曰松江北去吳國南

閉案南字依趙本加官本戴本無之玩下重衍國南五十里五字則此宜有南字 五十里江側有

丞胥二山山各有廟案此下近刻有國南五 魯哀公十三

年越使二大夫疇無餘謳陽等伐吳吳人敗之獲二大夫

大夫死故立廟于山上號曰丞胥二王也胥山上今有壇

石長老云胥神所治也下有九折路南出太湖闔閭造以

遊姑胥之臺以望太湖也松江自湖東北流逕七十里江

水歧分謂之三江口案此九字原本及近刻並訛作經近刻歧訛作奇何云江水歧分句非

經乃鄺注以朱長文吳郡圖經續記校 吳越春秋稱范蠡去越乘舟出三江

之口入五湖之中者也此亦別為三江五湖雖名稱相亂

不與職方同庾仲初揚都賦注曰今太湖東注為松江下

水經注匯校 卷二十九

七十里有水口分流東北入海為婁江東南入海為東江

與松江而三此非禹貢之三江也閔案此非七字依何趙加何云而三下吳郡圖

經續記有此非禹貢之三江也七字疑亦鄺氏原文趙本據以加之且云明此可以辨正蔡九峯書傳之謬

吳記曰一江東南行七十里入小湖為次溪自湖東南出

謂之谷水谷水出吳小湖逕由卷縣故城下神異傳曰由

卷縣秦時長水縣也始皇時縣有童謠曰城門當有血城

陷沒為湖有老嫗聞之憂懼且往窺城門門侍欲縛之嫗

言其故嫗去後門侍殺犬以血塗門嫗又往見血走去不

敢顧忽有大水長欲沒縣主簿合幹入白合合見幹曰何

忽作魚幹又曰明府亦作魚遂乃淪陷為谷矣因目長水

城水曰谷水也吳記曰谷中有城故由卷縣治也即吳之

柴辟亭

辟師古曰讀日壁

故就李鄉橋李之地秦始皇惡其勢王

合囚徒十餘萬人汗其土表以汗惡名改曰囚卷亦曰由

卷也吳黃龍三年有嘉禾生卷縣改曰禾興後太子諱和

改爲嘉興春秋之橋李城也谷水又東南逕嘉興縣城西

谷水又東南逕鹽官縣故城南舊吳海昌都尉治晉太康

中分嘉興立太康地道記吳有鹽官縣樂資九州志曰縣

有秦延山秦始皇逕此美人死葬于山上山下有美人廟

谷水之右有馬皋城故司鹽都尉城吳王濞煮海爲鹽于

此縣也是以漢書地理志曰縣有鹽官東出五十里有武

原鄉故越地也秦于其地置海鹽縣地理志曰縣故武原

鄉也後縣淪爲柘湖又徙治武原鄉改曰武原縣王莽名

水經注匯校 卷二十九

之展武漢安帝時武原之地又淪爲湖今之當湖也後乃

移此縣南有秦望山秦始皇所登以望東海故山得其名

焉谷水于縣出爲澉浦以通巨海

案引吳記至此胡渭云卽庾仲初所謂東南入

海爲東江者也

光熙元年有毛民三人集于縣蓋汎于風也

又東至會稽餘姚縣東入于海

謝靈運云具區在餘暨然則餘暨是餘姚之別名也

全云餘暨

今之蕭山也如何以爲餘姚之別名

今餘暨之南餘姚西北浙江與浦陽江

同會歸海但水名已殊非班固所謂南江也郭景純曰三

江者岷江松江浙江也然浙江出南蠻中不與岷江同作

者述志多言江水至山陰爲浙江今江南枝分歷烏程縣

南通餘杭縣則與浙江合故闕駟十三州志曰江水至會

稽與浙江合

案此所謂歷烏程縣南通餘杭縣則與浙江合者乃漢志所謂分江水之正流非南江枝

分也然則漢志餘姚為餘杭之誤以此證之甚明

浙江自臨平湖南通浦陽江趙

臨平湖在浙江西何以反自湖南通浦陽江乎此文容有錯謬

又于餘暨東合浦陽江自

秦望分派東至餘姚縣又為江也

案此下敘姚江在餘姚縣南者其水非浦陽江

之分派道元欲附會經東至餘姚入海之文故有此說

東與車箱水合水出車箱山

乘高瀑布四十餘丈雖有水旱而澍無增減江水又東逕

黃橋下

案此八字原本及近刻並誤作經攷浙江自臨平湖南通浦陽江以下乃注內因經之訛別敘餘姚

之臨江有漢蜀郡太守黃昌宅橋本昌創建也昌為州書

佐妻遇賊相失後會于蜀復脩舊好江水又東逕赭山南

虞翻嘗登此山四望誠子孫可居江北世有祿位居江南

則不昌也然住江北者相繼代興時在江南者輒多淪替

水經注匯校

卷二十九

仲翔之言為有徵矣江水又經官倉倉即日南太守虞國

舊宅號曰西虞以其兄光居縣東故也是地即其雙雁送

故處江水又東逕餘姚縣故城南縣城是吳將朱然所築

南臨江津北背巨海夫子所謂滄海浩浩萬里之淵也縣

西去會稽百四十里因句餘山以名縣山在餘姚之南句

章之北也江水又東逕穴湖塘湖水沃其一縣並為良疇

矣江水又東注于海是所謂三江者也故子胥曰吳越之

國三江環之民無所移矣但東南地卑萬流所湊濤湖汎

決觸地成川枝津交渠世家分夥故川舊瀆難以取悉雖

麤依縣地緝綜所纏亦未必一得其實也

潛水出巴郡宕渠縣

潛水蓋漢水枝分潛出故受其稱耳今爰有大穴潛水入焉通岡山下西南潛出謂之伏水或以爲古之潛水鄭玄曰漢別爲潛其穴本小水積成澤流與漢合大禹自導漢疏通卽爲西漢水也故書曰沱潛旣道劉澄之稱白水入潛然白水與羌水合入漢是猶漢水也縣以延熙中分巴立宕渠郡蓋古賓國也今有賓城縣有渝水夾水上下皆賓民所居漢祖入關從定三秦其人勇健好歌舞高祖愛習之今巴渝舞是也縣西北有徐曹水南逕其縣下注潛水縣有車騎將軍馮緄桂陽太守李温冢二子之靈常以三月還鄉漢水暴長郡縣吏民莫不于水上祭之今所謂馮李也

水經注匯校

卷二十九

九

又南入于江

庾仲雍云墊江有別江出晉壽縣卽潛水也其南源取道巴西是西漢水也

湍水

趙云元遺山集長發石門渡湍水道中詩自注水經湍音專

出酈縣北芬山南流過

其縣東又南過冠軍縣東

湍水出弘農界翼望山水甚清徹東南流逕南陽酈縣故城東史記所謂下酈析也漢武帝元朔元年封左將黃同爲侯國湍水又南菊水注之水出西北石澗山芳菊溪亦言出析谷蓋溪澗之異名也源旁悉生菊草潭澗滋液極成甘美云此谷之水土餐挹長年司空王暢太傅袁隗太尉胡廣並汲飲此水以自綏養是以君子留心甘其臭尚

矣。菊水東南流入于湍。湍水又逕其縣東南。歷冠軍縣西。北有楚塢。高下相承八重。周十里。方塘蓄水。澤潤不窮。湍水又逕冠軍縣故城。東縣本穰縣之盧陽鄉。宛之臨駢聚。漢武帝以霍去病功冠諸軍。故立冠軍縣以封之。水西有漢太尉長史邑人張敏碑。碑之西有魏征南軍司何云司下疑脫。一馬字。趙云晉魏之際有軍司馬。張詹墓。趙云張詹寰又有軍司胡三省曰軍司軍司馬也。字記作張澹。墓有碑。碑背刊云。白楸之棺。易毀之裳。銅鐵不入。丹器不藏。嗟矣。後人幸勿我傷。自後古墳舊冢。莫不夷毀。而是墓至元嘉初。尚不見發。六年大水。蠻饑。始被發掘。說者言初開金銀銅錫之器。朱漆雕刻之飾。爛然有二。朱漆棺。棺前垂竹簾。隱以金釘。墓不甚高。而內極寬大。虛設白楸之言。

水經注匯校 卷二十九

空負黃金之實。雖意錮南山。甯同壽乎。湍水又逕穰縣。為六門。陂漢孝元之世。南陽太守邵信臣以建昭五年。斷湍水立穰。西石塢。至元始五年。更開三門。為六石門。故號六門。塢也。溉穰新野昆陽三縣五千餘頃。漢末毀廢。遂不脩。理晉太康三年。鎮南將軍杜預復更開。廣利加于民。今廢不脩矣。六門側又有六門碑。是部曲主安陽亭侯鄧達等以太康五年立。湍水又逕穰縣故城北。又東南逕魏武故城之西南。是建安三年曹公攻張繡之所築也。

又東過白牛邑南。趙云按章懷後漢書注白牛蓋鄉亭之號在鄧州東

湍水自白牛邑南。建武中世祖封劉嵩為侯國。東南逕安眾縣故城南。縣本宛之西鄉。漢長沙定王子康侯丹之邑。

也。湍水東南流，涅水注之。水出涅陽縣西北岐棘山東南，逕涅陽縣故城西。漢光武元朔，何云按史記作元封趙本元封四年封路最爲侯國。王莽之所謂前亭也。應劭曰：在涅水之陽矣。縣南有二碑，碑字紊滅，不可復識。云是左伯豪碑。趙云左伯豪，涅陽人也。涅水又東南逕安眾縣，竭而爲陂，謂之安眾港。魏太祖破張繡，于是處與荀彧書曰：繡遏吾歸師，迫我死地。蓋于二水之間，以爲沿涉之艱阻也。涅水又東南流，注于湍水。

又東南至新野縣

湍水至縣西北，東分爲鄧氏陂。漢太傅鄧禹故宅與奉朝請西華侯鄧晨故宅，隔陂。鄧颺謂晨宅略存焉。

水經注匯校

卷二十九

七

東入于湍

案此四字原本訛入注內，接略存焉。下近刻仍作經文，接又東南至新野縣下。

均水出析縣北山，南流過其縣之東。

何云廣韻：箋，均水各出。浙縣北山入沔，今作均。

下文均口蓋道元之本文，此均字後人妄改。趙云均均同音，均即均也。

均水發源弘農郡之盧氏縣熊耳山，山南即脩陽。葛陽二縣界也。雙峯齊秀，望若熊耳，因以爲名。齊桓公召陵之會，西望熊耳，即此山也。太史公司馬遷皆嘗登之。縣即析縣之北鄉，故言出析縣北山也。均水又東南流，逕其縣下。南越南鄉縣。案下南越三字有舛誤，當作又南逕。又南流與丹水合。又南當涉都邑，北南入于沔。

均水南逕順陽縣。西漢哀帝更爲博山縣，明帝復曰順陽。應劭曰：縣在順水之陽，今于是縣則無聞。于順水矣。章帝

建初四年封衛尉馬廖為侯國晉太康中立為順陽郡縣
西有石山南臨均水均水又南流注于河水謂之均口者
也故地理志謂之育水言熊耳之山育水出焉又東南至
順陽入于河案地理志弘農郡盧氏熊耳山在東又有育
水南至順陽入河 趙云漢志宏農郡盧氏
縣下云有育水南至順陽入河育水即均水非自鄧入河
之消水也 全云育消之不可混猶均均之不可通也蓋
與遇鄧入河
之消有別也

粉水出房陵縣東流過郢邑南

粉水導源房陵閉案房陵二
字依趙本加東流逕上粉縣趙云上粉縣
不知何時立

兩漢晉宋魏諸志皆無之豈曹氏所置而旋廢者與寰宇
記房陵縣有粉城河水篇經注均有是縣此與沮水篇之
臨沮縣同一卷
中之可疑者也取此水以漬粉則皓耀鮮潔有異眾流故
縣水皆取名焉

水經注匯校 卷二十九

又東過穀邑南東入于河

粉水至筑陽縣西而下注于河水謂之粉口粉水旁有文
將軍冢墓隧前有石虎石柱甚脩麗閭丘羨之為南陽葬
婦墓側將平其域夕忽夢文諫止羨之不從後羨之為楊
佺期所害論者以為文將軍之祟也

白水出朝陽縣西東流過其縣南

王莽更名朝陽為厲信縣應劭曰縣在朝水之陽今朝水
逕其北而不出其南也蓋邑郭淪移川渠狀改故名舊傳
遺稱在今也

又東至新野縣南東入于消

比水出比陽東北太胡山案比原本及近刻並訛作泚注內
同卷之三十二泚水亦訛作泚攷

漢書地理志南陽郡比陽應邵曰比水所出東入蔡又廬江郡濡縣泚山泚水所出北至壽春入芍陂師古曰音比又布几反今據以訂東南流過其縣南泄水從南來注之正二水之名

太胡山在比陽北如東三十餘里廣圓五六十里張衡賦南都所謂天封太狐者也應劭曰比水出比陽縣東入蔡經云泄水從南來注之然比陽無泄水蓋誤引壽春之泚泄耳趙云泄水與入蔡之泚水了無關涉此篇經云泄水從南來注之自是經誤道元故辭而闕之余以延昌四年蒙除東荊州刺史州治比陽縣故城城南有蔡水出南磐石山故亦曰磐石川西北流注于比非泄水也呂氏春秋曰齊合章子與韓魏攻荊荆使唐蔑應之夾比而軍欲視水之深淺荆人射之而莫知也有芻者曰兵盛則水淺矣章子夜襲之斬蔑于是水之上也比水又西澳

水經注匯校

卷二十九

水注之水北出苾丘山東流屈而南轉又南入于比水按山海經云澳水又北入視不注比水余按呂忱字林及難字爾雅並言灤水在比陽脈其川流所會診其水土津注宜是灤水音藥趙云二字乃注中注也比水又西南歷長岡舊月城北比水右會馬仁陂水水出無陰北山泉流競湊水積成湖蓋地百頃謂之馬仁陂陂水歷其縣下西南竭之以溉田疇公私引裂水流遂斷故瀆尚存比水又南逕會口與堵水枝津合比水又南與澧水會澧水源出于桐柏山與淮同源而別流西注故亦謂水為派水澧水西北流逕平氏縣故城東北王莽更名其縣曰平善城內有南陽都鄉正衛彈勸碑澧水又西北合澨水水出湖陽北山西流北

屈逕平氏城西而北入澧水澧水又西注比水比水自下亦通謂之爲派水昔漢光武破甄阜梁丘賜于比水西斬之于斯水也。比水又南趙醴二渠出焉。比水又西南流謝水注之水出謝城北其源微小至城漸大城周迴側水申伯之都邑。詩所謂申伯番番既入于謝者也。世祖建武十三年封樊重少子丹爲謝陽侯卽其國也。然則是水卽謝水也。高岸下深浚流徐平時人目之爲淳澹水。城戍又以淳澹爲目非也。其城之西舊棘陽縣治故亦謂之棘陽城也。謝水又東南逕新都縣左注比水。比水又西南流逕新都縣故城西王莽更之曰新林郡國志以爲新野之東鄉故新都者也。

水經注匯校

卷二十九

十四

又西至新野縣南入于澧

比水于岡南西南流戍在岡上

全云此岡卽上注云長岡也

比水又西

南與南長坂門二水合其水東北出湖陽東隆山山之西側有漢日南太守胡著碑。子珍騎都尉尚湖陽長公主卽光武之伯姊也。廟堂皆以青石爲階陛。廟北有石堂珍之立孫桂陽太守瑒以延熹四年遭母憂于墓次立石祠勒銘于梁石字傾頽而梁字無毀。盛弘之以爲樊重之母畏雷室蓋傳疑之謬也。隆山南有一小山山坂有兩石虎相對夾隧道雖處蠻荒全無破毀作制甚工信爲妙矣。世人因謂之爲石虎山其水西南流逕湖陽縣故城南地理志曰故廖國也。竹書紀年曰楚共王會宋平公于湖陽者矣。

東城中有二碑。似是樊重碑。悉載故吏人名。司馬彪曰。仲山甫封于樊。因氏國焉。爰自宅陽。徙居湖陽。能治田殖。至三百頃。廣起廬舍。高樓連閣。波陂灌注。竹木成林。六畜放牧。魚羸梨果。檀棘桑麻。閉門成市。兵弩器械。貲至百萬。其興工造作。爲無窮之功。巧不可言。富擬封君。世祖之少數歸外氏及之。長安受業齎送。甚至世祖卽位。追爵敬侯。詔湖陽爲重立廟。置吏奉祠。巡祠章陵。常幸重墓。其水四周城。溉城之東南。有若令樊。蒟中常侍樊安碑。城南有數碑。無字。又有石廟數間。依于墓側。棟宇崩毀。惟石壁而已。亦不知誰之冑族矣。其水南入大湖。湖陽之名縣。藉茲而納稱也。湖水西南流。又與湖陽諸陂散水合。謂之板橋水。又西南與醴渠合。又有趙渠注之。二水上承派水。南逕新都縣。故城東兩瀆。雙引南合。板橋水。板橋水又西南與南長水會。水上承唐子襄鄉諸陂散流也。唐子陂在唐子山。西南有唐子亭。漢光武自新野屠唐子鄉。殺湖陽尉。于是地陂水深。光武後以爲神淵。西南流于新野縣。與板橋水合。西南注于比水。比水又西南注于涓水也。